

Antoine-Blaise Crousillat

L'Eissame



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

ROUMANÇO

L'ama d'amour jusqu'au delire,
Mai que tout ço que li a dessouto lou souleu
De pu dous, de pu beu;
L'ama sènso auja va li dire,
De pòu qu'un laid refus crèisse voueste martire,
O v'embrigue lou couer coumo un cop de fusieu,
Digas-me se n'es pas lou sort lou pu catieu!
L'ama d'amour en desperanço,
Maucoura, despicha tant! que, las de souffrì,
Voudrias quasi mourì. . .
Piei vèngue un regard d'amistanço,
Un pichot rise, un mot paga vouesto coustanço,
Vous dire: — Enfin me rènde, enfin t'ame pereu,
Li a-ti, respoundès-me, pu dous soulas qu'aqueu?
L'ama d'amour jouino, poulido,
Braveto subre-tout, e se jougne d'un nous
A faire qu'un de dous;
E pu gai ensèn, de la vido
Persegre jusqu'au bout la draio proun marrido
En marchant toujours dre, lou front siau, lou couer pur,
Digas se pòu la terro avé pu beu bonur!

16 d'abrieu 1864.